



partii naleraq

UKA2015/102  
18-11-2015

**Pisortanit ikiorsiissutitut malittarisassanik qanoq ililluta sukaterisinnaavugut kiisalu qanoq pitsannorsarsinnaanerigut apeqquaqat aallaavigalugu oqallinnissamik siunnersuut, taamaalilluta suliffissaaleqisunut atugassaritaasut pitsannorsarnissaat kiisalu utaqqiinnartunngortitsinaveersarneq anguniarlugu.**

(Inatsisartunut ilaasortaq Peter Olsen, Inuit Ataqtigii)

Inatsisartunut ilaasortaq Peter Olsen Inuit ataqtigii oqallinnissamik siunnersuuteqarpoq tassalu pisortanit ikiorsiissutit qanoq sukaterneqarsinnaanersut tamannalu Partii Naleqqamiit oqaaseqarfigissavarput.

Nunatsinni siunissami imminnut napatinnissarput nunattalu namminersulivinnissaa naalagaaffinngorluni anguniarparput. Taamaattumik tamatta sulisinnaasut ilungersorluta nunarput napatinniarlugu sulisariaqalerpugut allanik avataaniit inuttut inuiattullu ikiorneqarnissaq kisiat isumalluutigina.

Nunatsinni innuttaasut tamatta peqqikkutta imminnut napatinnissarput pilersornissarpullu pisussaaffigaarput, akisussaaffillu allanut tunniuttariaqanngilarput. Inummi peqqissoq aamma inuiaqtigiiinnut pisussaaffeqarpoq tassalu sulinikkut allatigullu artuukkissutaanani inuiaqtigiiinnut pilersueqataalluni pisussaaffeqarlunilu napatitseqataassalluni.

Soorunami inuit sulisinnaanermikkut killeqartut innarluutillit napparsimasut sulisinnaajunnaarsimasut suliffissaaleqisullu pisussaaffigaagut ataqqinartumik inuuneqarnissaannut ikiussallugit tamannalumi minnerpaamik pissusissamisoorpoq.

Kisiannili inuit peqqissut sulisinnaanermikkullu ajornartorsiuteqanngitsut eqqarsaatigissagaanni ilaatigut ilatsiinnartunngortinneqartarnerat aamma takussaasoq assartorsinnaanngilarput, tamakkunungalu qanoq iliuseqarnerunissarput sukateriffiqeersinnaanerallu eqqarsaatigisariaqarparput.

Ukiuni makkunani inuppassuit suliffissaaleqippuit kisiannilu aamma suliffippassuit sulisussaminnik amigaateqartarlutik pingaartumik aasaanerani aalisakkanik suliffissuit sulisussaminnik amigaateqarlutik tunisassianik nalilinnik eqqaasariaqaleraangata assut ilungersunartarpoq nalunagulu suliffissaaleqisut tusintit arlallit suliffeqanngikkaluartut.

Nunatsinni siunissami sulisinnaasut ikiliartuinnartussaasut nalilersuisartunik eqqoriarneqartarput tamannalumi uniorpallaarunangilaq, tassami qangamut naleqqiullugu Kalaallit meeqqiornerat annikilliarporpoq inunngortartummi ikiliartuinnavippuit.

Taamatullu ingerlaannassagutta aningaasaqarnikkut ilaatigut oqimaatsunik nammataqaleriartussaagut, taamaattumik siunissamut sillimmartaarluta aaqqissuussisariaqalerpugut aningaasammi kuuinnangillat, taamaattumik sulisinnaasut tamarmik sulisariaqarput, pisinnaatitaaffiigummi kisiisa ujarunnaarlugit akisussaaffimmik aamma tiguseqataasariaqaleratta.

Soorunami ingerlaaseq immikkoortukkuutaarlugu aaqqinniarsinnaangilarput inuit sulerusukkaluartut aamma ilaatigut meeqqamik paarsisussaqaannginnerat meeqquerivinnillu amigaateqarneq pissutigalugu ilaatigut suliniarnissaminnut periarfissaaruttarmata taamaattumik kommunit peqatigalugit meeqquerivinnut periarfissat aamma pitsangorsartuarnissaat pinngitsoorsinnaangilarput.

Inunnik isumaginninneq qiviaraanni aammalu sulisinnaasut amerlisassagutsigit sulinerup imminut akilersinnaasumik aaqqissuussiffigineqarnissaa ilanngullugu eqqarsaatigisariaqarparput. Ilaatigut suliffissaaleqisut sulilaarpata ikiorsiissutitut pisartakkaminut sulinerminni aningaasarsippata taarsersuisinneqalertarput.

Taamaliorneqartarnerallu aamma soorunami sulerusussutsimik killiliisarpoq suliffissaaleqisullu ilaatigut artorsinneqartarput tamannalu pissutigalugu ilaanni sulineq akilersinnaanngitsutut nalilerneqartarluni taamaattumik aamma tamakkua ilanngullugit nalilersorneqartariaqarput.

Ilaatigut aamma inuit imminnut pilersorusukkaluartut namminnerluinnarluta mattussortarpagut aalisartortagut piniartortagullu ilaatigut periarfissaarutsinneqartarput naalackersuinikkut torrallaasannginnerput pissutigalugu.

Inuit taamatut unittortinneqartut allamik periarfissaqaanngillat ilaqtatik napatissagunikkut pisortanut saaffiginnittarput ikiorserneqaqqullutik, tamannalu tulluanngilluinnarpoq aningaasaqarnikkut killiffipput eqqarsaatigalugu, tassami pingaartumik inuit imminnut tatigalutik ilaqtaminnik meeqqaminnullu napatitserusukkaluartut aalisarsinnaajunnaarlugit piniarsinnaajunnaarlugillu mattussuisarnerput ingasattajaarneruvoq akuersaarneqarsinnaanngitsaq.

Tassami pissusissamisunngilluinnarpoq inuit peqqissut imminnut ilaqtaminnullu pilersuerusukkaluartut mattussussallugit inuit peqqissut tamarmik sulissapput ilatsiinnartunngorsarneqarnissaat anguniagaanani akerlianik imminnut napatinnissaannut aqutissiullugit, neriuppugut pissutsit tamakku massakut qaangertariaqalerigut inuiaqatigiinnimi akissaqaanngilugit imminut napatinniartut mattussussallugit.

Kiisalu ilaqtariit meerartallit ikiorsertariaqartut eqqarsaatigalugit ullumikkut aningaasanngorlugit inuussutissanut atisassarsiutissallu eqqarsaatigalugit ikiorsiissutaasartut annertussusii naapertuunnersut ilanngullugu eqqarsaatigineqassasqoq Partii Naleqqamiit oqaatigerusupparput.

Ullutsinni nioqqutissat atisallu akii qiviassagaani ikiorsiinermi aningaasat pingaartumik meerartallit, aammalu angajoqqaat anaanat ataatalu kisimiittut eqqarsaatigalugit ullutsinnut naleqqunnersut naliliiffigisariaqalerpagut, ikiorsiissutit amigaartorujussupput meeqqami eqqarsaatigissagaanni inuussutissaqarnissaat atisassaqaarnissallu tamakkiisumik qulakkerneqarsimangillat, aningaasallu ikiorsiissutaasartut tigusartagaasalu nalilersornissaat ilanngullugu kammattuutigaarput.

Peter Olsen Inuit ataqatigiit oqallissaarutaa soqtiginartoq aammalu imminut napatinnissamut imminullu akisussaaffiginissamut oqallissaarummik saqqummiussaqaqnera soqtigalugu taamatut oqaaseqarfigaarput annertuumillu tapersorsorlugu.

Tamatta pisussaaffipput ilisimasariaqarparput tassami anguniagassaangilaq allanik ikiorneqarluta inuutinneqarnissarput peqqikkutta pisinnaatitaaffiit kisiisa ujarunnaarlugit aamma uagutsinnut pisussaaffilertariaqarpugut meerartagut inuusuttortagut utoqqartagullu pillugit maligassasiuinerusariaqarpugut nunarput inuilu pillugit taamatullu alloriarutta tulluusimaarutissagut annertusissaqaat puigussangilarpummi nunarput namminersulivinniarmat taamaattumik pisinnaatitaaffigut kisiisa ujarunnaarlugit pisussaaffimmik tiguisariaqarlerpugut pisinnaatilluta allanik ikiorneqaannassagutta inuiaqatigiinnut nanertuutalissagatta.

Hans Enoksen